

欽定剿平三省邪匪方略

欽定剿平三省邪匪方略續編卷十五

癸亥年

六月十八日

辛巳

額勒登保勒保奏言

臣

等昨於

開縣所屬縣壩地方會合卽由縣壩向溫湯井
朱家壩周家灣巖水壩一帶顧住老林沿邊督
率官兵扼要堵截仍分派各鎮將一面將老林
排搜一面將由老林轟出之賊迅速分投剿洗
茲據叅將陳弼稟報探有賊匪三四十人由八

寶刀竄來在萊池子老林藏匿卽分兵入林搜捕當獲賊匪四名正在搜捕適叅將哈豐阿劉健標等由七里坪趕來又獲賊二名餘匪丟棄器械先後由苟家漕宛家山西奔當飭令守備張必祿帶勇跟追務期全數剿淨又有散匪七八人奔紅石巖老林卽派遊擊湯占先帶兵搜捕哈豐阿劉健標卽由高坪一帶而進陳弼由

亮垵子黃連厰一帶而進初四日陳弼帶兵至
十五丈溝老林探有由中岡嶺竄來一起賊匪
現在廟梁子相距不遠卽翻山進擊殺賊二名
生擒二名有執旗賊目一名集衆拚命抵拒鄉
勇羅得興認識該逆卽係熊老八當時奮勇向
前用矛戳傷該逆右腿該逆棄械滾巖欲逃復
有鄉勇胡貴向前抱住該逆尙掙挫抵拒經軍

功盧仕俸用刀復將該逆左腋戳傷又有軍功
伍得一蔡汝寅等一同上前擒住陳弼立加查
訊該逆自認熊老入不諱餘匪見賊首被擒均
棄械鑽林跳坎四散陳弼將該逆熊老入并其
餘活賊解送來營詎該逆受傷深重於途次斃
命該犯曾經戕害穆克登布_臣等遵照

諭旨將該逆屍身割示眾仍將首級裝盛木匣派

委守備馬起龍把總湯大英等解送到部以便
轉付穆克登布之父成德致祭其餘活賊審明
就地正法並給發賞銀二百兩飭交陳弼分賞
出力鄉勇羅得興等以示獎勵又據副將桂涵
稟報連日兼程趕剿西竄之賊又分兩起一起
由倒迴水竄至黑包山一起二十餘人潛匿鶯
嘴巖桂涵率兵趕至鶯嘴巖乘夜搜捕當斃賊

匪三名生擒二名棄械投出二名據供此起賊
匪二十餘人係王文舉管帶同逃其竄往黑包
山之數十人係陳先鋒管帶現在王文舉等十
餘人都在林內情願投出桂涵當派軍功鄉勇
帶同該犯等一面逐處排搜一面聲喊投出免
死隨據王文舉等十四名均棄械跪投桂涵接
名查點卽帶同該犯等探剿西竄黑包山之賊

沿途躡探該匪約有四十餘人竄至畫角嶺經
桂涵督率守備李思貴外委曾天成何文額外
外委冉錫元李長安等分帶兵勇四面圍捕桂
涵所帶先行投出之王文舉等引路向前斃賊
九名餘匪三十四名全數生擒此股全行辦淨
查訊獲犯內有僞先鋒陳宗免桂涵一併解交
東鄉縣收審_臣等卽批飭川東道鄭成基提至

綏定詳細審辦飭令桂涵率領原兵帶同王文
舉等前來

臣

等軍營聽候安插又據副將馬元

遊擊劉彪稟報由桐梓山三漚口一帶探剿零

匪在小峯漕鐵厰灣林內斃賊四名生擒十八

名查訊此起僅二十五人在逃只有二名

臣

等

當飭將獲犯就近解新寧縣審辦並飭馬元等

躡探附近有無零匪卽行搜淨以靖地方又據

田朝貴稟報連日分兵由鳳凰山鐵廠溝老君
莊等處老林分路排搜有零匪憑高望見官兵
先已分竄當斃賊一名生擒二名餘匪分起亂
竄我兵分投追擊又獲賊八名斃斃二名有貴
州長寨營外委魏光啟入林追搜被賊矛傷陣
亡當經旗手李上栢吳金泉上前將該匪戮斃
田朝貴仍分兵數路搜剿將獲犯解送來營訊

明正法又據達斯呼爾岱羅聲稟報連日由
迴峯山笋子坪元梁子一帶老林排搜紮營青
灣子探聞該匪數十人由雪泡山老林竄來距
營不遠遂派遊擊張拱辰帶兵出擊時已昏黑
賊匪佔據高山滾放木石我兵悉力仰攻當斃
賊匪四名生擒二名該匪仍逸入老林陣亡兵
丁二名達斯呼爾岱等現由雪泡山跟蹤探剿

又據總兵達自祥稟報在川北雙河口搜獲賊
匪楊金棒一名查係靳逆駁內先鋒又據叅將
羅思舉稟報在雞鳴寺老林搜獲賊匪三名均
係牙手均卽正法又據副將唐文淑稟報派令
把總劉喬帶兵搜捕斃賊三名生擒四名又遊
擊劉元明搜獲賊匪五名隨營委員王世範督
同通江團勇擒獲賊匪一名又防守陝界總兵

國興阿搜獲賊匪三名總兵汪啟搜獲賊匪二
名均卽訊明分別辦理并據各該鎮報稱川陝
沿邊一帶現俱寧謐其提督楊遇春督率副將
張瑗叅將祝廷彪帶領兵勇在楚境房竹搜剿
所有斬獲情形俱經報明德楞泰奏陳

聖鑒此時楚省殘匪無多二竹境內亦均寧靜

臣額

勒登保已知照楊遇春如所辦殘匪已經搜盡

卽率張瑗等帶領原兵由雞心鎮坪取道川界
黃墩高官寺城口大竹河一帶由東向西排搜
川陝邊界潛匿零匪以期隨地廓清臣伏查此
時餘匪愈剿愈少連日鎮將等殲擒賊數共有
一百三十餘名計川境所餘零匪不過二三百
人但該匪等畏避官兵一見卽四散逃竄往往
官兵所至杳無蹤跡兵過又偷出搶掠若因此

久稽大兵糜費錢糧稽延時日殊爲不值

臣等

連日熟籌擬將東三省及外省客兵全行凱撤酌將本省留防官兵協同地方文武團練分段責成將未淨一二零匪搜捕淨盡俾地方永臻寧謐奏入

上命軍機大臣傳諭額勒登保德楞泰勒保曰額勒登保等督率各路將領分投搜捕均有斬獲共計

獲擒一百三十餘名並將戕害穆克登布之首逆
熊老八生擒齣示衆仍將首級委員解京交穆
克登布之家於墳塋致祭實足以快人心而彰國
憲但同時戕害穆克登布之賊尙有余佐斌一犯
必當嚴拏務獲勿任漏網川境餘匪祇剩二三百
人爲數已屬無多不難剋期殄滅現在楚省零匪
統計亦不過百餘名昨已有旨令德楞泰由楚入

川向西排搜計此旨到時該叅贊諒亦可抵川境
額勒登保等與伊會合後即可籌商由六百里馳
奏三省肅清但此係全局歲功必須詳慎周妥爲
一勞永逸之計去臘馳奏大局戡定搜捕餘匪延
至半年之久此次奏報肅清之後若另生枝節拖
延時日汝等亦不能任此重咎必須慎之又慎方
爲萬全固應辦理迅速尤不可稍有草率至摺內

稱現擬將東三省及外省客兵全行凱撤酌將本省留防官兵協同地方文武團練分段搜捕餘匪等語此時零匪無多自不值久稽大兵虛糜糧餉但本省官兵如果足敷留防自可將徵調各兵全行撤去倘察看情形本省兵丁或尙不敷用不妨將近省客兵及東三省之徵調未久者酌留若干爲防守之用德楞泰入京展覲將東三省官兵順

便帶回亦無不可至隨征鄉勇一項本非各寨堡團勇可比前曾節次降旨諭令額勒登保等於大兵未撤之前先行陸續裁撤誠以該勇等半係無業遊民從征日久多有桀驁難馴之氣不可不預爲安置乃此次摺內何以僅稱凱撤東三省官兵及外來客兵而於鄉勇轉未提及設歲功以後將官兵全數撤回該鄉勇等間有滋事又何以彈壓

額勒登保等寧不籌慮及此乎且昨日召見前任
陝省藩司溫承惠詢以該省現留兵勇數目據稱
在陝之兵約有三萬一千餘名鄉勇約有六千餘
名今閱摺內所稱防守陝界總兵國興阿搜獲賊
匪三名總兵汪啟搜獲賊匪二名以三萬六七千
之衆僅止搜拏殘匪五名是各處防守兵勇徒多
無益其應如何裁撤之處著額勒登保等詳悉會

議具奏所有此次擒獲熊老入之出力鄉勇羅得
興胡貴軍功盧仕棒除額勒登保賞給銀兩外並
著查明該鄉勇軍功等如現無頂戴卽賞給八品
頂戴倘業有頂戴卽賞戴藍翎以示鼓勵其殺賊
陣亡之貴州長寨營外委魏光啟著咨部賜卹

二十一日

甲申

德楞泰奏言竊

臣

據叅將馬文斌

涂陞稟報連日由房縣一帶搜捕至興山界內

探得偏巖子有零匪屯聚派兵勇搜剿二十日
黎明趕至偏巖子遇有賊匪十五六人竟敢恃
險迎敵經兵勇擒剿殺斃旗手一名餘匪紛紛
鑽林跳巖奔逃又殺賊三名又據總兵吉林泰
稟報巴東一帶現無賊蹤又派兵搜至巫山之
湖交林山後遇零匪七名趕殺一名淹斃二名
生擒四名此起零匪已盡獲犯內訊出張玉清

係青號僞軍師羅克升係僞先鋒一併解送來

營臣訊明辦理又據副將張應貴馬應國呢瑪

善等稟報分兵由歸州一路排搜南至野竹山

有賊匪六名見兵卽逃追至江岸之葉灘拏獲

賊匪二名戮殺一名其餘三名均被衝入江心

淹斃又據叅將王占鰲李貴守備周永泰鄒志

賢稟報至歸州之水田壩河口拏獲賊匪一名

又至王家坡搜獲賊匪一名又據叅將毛秉剛
都司史定川等稟報搜至歸州之楊鼓匠坪老
林拏獲賊匪二名戮斃一名又據遊擊李東宣
稟報分兵由歸州之大小峽一帶逐日排搜探
有零匪數人夜出掠食由賈家店竄至長嶺溝
卽連夜赴彼拏獲二名內有僞先鋒陳子龍一
名見兵趕急自用刀抹傷右項旋經兵勇拏獲

又據興山縣五童寨寨首賀廷珍擊獲賊匪一名所有各路獲犯並耳記陸續解送到營

臣

均

訊明分別辦理其殲擒之兵勇寨首均皆照舊按名給賞又接楊遇春來信前由竹山剿剩餘匪派出叅將祝廷彪率同千總唐大德把總劉彪蒲明等帶兵趕追在鐵廠紅花梁一帶殲斃賊匪五名生擒四名所剩八九人有竄彥麥嶺

之勢仍令祝廷彪等分投排搜又接豐紳來信
前由陰條嶺竄入大寧後窺馬塘之賊折回竹
鞞之梨子坪陰峪河硝碭子一帶聚有賊匪五
十餘人有向大凹老山之勢豐紳卽帶兵馳往
抄截迎住賊頭當殺賊三名生擒五名又趕緊
力追殺賊二名生擒六名餘匪三四十名連夜
由水漕子關口山老林逃逸慶溥又派遊擊馬

濟勝李天林遊擊銜都司麻光裕等帶兵由相思嶺等處扼剿豐紳另派遊擊王國輔等跟追

臣又飛飭守備謝金章等前往協剿查該逆所

剩不過三十餘名不日即可掃除又探得保康之金斗坪有山內逃出零匪十數名假充哨探

兵勇西奔有走栢木壽陽入山之勢臣當派藍

筒軍功楊昌泰帶兵一百名前往跟追至楚境

東面老山如南漳縣之馬良坪遠安縣之店子
壩東湖縣之紙房舖秀水霧渡河焦贊壩殷家
坪一帶業已往來遍搜無賊其歸州所屬之青
灘茅坪廟坪魯家河五支山紅曲鄉萬古寺保
康所屬之黃家泡石屋頭涼風壩七脚坪朝陽
寨竹園河羅家壩青山太陽壩公坪房縣所屬
之毛家河茶園河飛虎寨唐家灣方家坪毛山

觀簸箕山光化寨鳳凰寨牛欄頭天興寨水菓
園雙合寨雷公坡貓兒觀三顆樹白菓樹平頂
塘馬頭寨馬家河興山所屬東北面之寒水河
三溪河巖寨梨子坪火燒巖東岳寨楊家莊林
家寨石杆洞三溪園楊家寨菜花坪秦家寨五
道溝三寶寨故村河三星寨羅裙巖厚朴寨涼
風埡吳寨兩河口並東南之建陽坪百里山雞

公梁天寶山佛堂坪大小峽栗子坪后界坪夏陽河水月寺樹公坪大坪石溝子青龍口石佛寺兩河口黃連坪以上各屬老山臣俱已分派兵勇遍搜兩次實無遺孽其房縣南面老山內尚有餘匪十餘名有楊遇春一路兵勇並臣派去之叅將馬文斌涂陞等帶領兵勇在彼分路搜擊卽日可以肅清其餘各路搜捕之賊現在

均聚於邊界之上有西竄入川之勢不過三四

十名

臣

應卽移師前往督飭趕辦第思東面與

歸各山內或有一二藏匿之匪或有落後人夫
鄉勇及土匪出沒滋擾均未可定現今副將呢

瑪善叅將王占鰲李貴等各帶原兵往來巡查

楊遇春帶兵在北面房竹一帶排搜足資策應

又據總兵浦尙佐稟報外委朱仲魁於初二日

在巫山之二坪山同寨勇殲賊三名滾巖跌死
一名又軍功劉國輔在琴樂坪後山梁搜獲賊
匪一名殺斃一名均交巫山縣訊報蒲尙佐因
探報副將羅聲臯等在大寧山內追剿之賊匪
一百四五十名已出山東竄卽帶兵馳赴大寧
水口迎剿此外各處俱經指定地界設卡安兵
分飭鎮將等派兵循環遍行搜巡臣現在趕赴

巴巫界上一面督飭各路將弁將界上殘匪併力掃除一面探明羅聲臯所追之賊前往夾擊又可與額勒登保會晤籌商辦理奏入

上命軍機大臣傳諭德楞泰曰德楞泰奏稱各路搜捕之賊現在均聚於邊界之上不過三四十人是楚省零匪已屬無多自不難計日肅清但此等潰匪視官兵爲趨避而大山老林之內尤易藏奸卽

如摺內所稱楚境東面一帶南漳縣之馬良坪以
至兩河口黃連坪數十處地方均已分派兵勇遍
搜兩次實無遺孽一節此卽不足深恃各該處老
山內現有官兵四路搜查該匪等自無從竄跡迨
官兵過後安知他處不有未淨餘孽潛往伏匿日
久別滋事端殊有關係上年馳奏大局戡定則搜
捕餘匪原係善後應辦事宜尙不妨稍寬時日今

搜捕已閱半年之久若奏報肅清以後另生枝節成何事體况據奏此次偏巖子賊匪不過十五六人尙敢恃險迎敵可見此內尙有兇橫予手是以叠次降旨諭令不可全撤兵勇德楞泰等必須慎之又慎實屬萬全周妥始可謂全局蕪功至所稱指定地界設卡安兵之處已分飭總兵等派兵循環遍行搜巡一節此在鎮將大員等自不致飾詞

具報而其屬下弁兵保無有未經親歷遽以搜查
並無餘匪爲詞是則有名無實德楞泰尤當飭令
實力搜查毋任空言搪塞爲要

二十四日

丁亥

軍機大臣慶桂等會同吏部奏議

覆惠齡奏善後事宜四條一南山西鄉平利商
州鎮安各州縣均准其改爲繁缺一南山內各
州縣准其就地方大小各酌添壯丁數十名在

於隨征鄉勇內挑選其口食先以查出絕產叛
產變價生息支放再行籌款一陝省各屬因軍
需動撥常平倉穀應行買補其山內各州縣原
貯倉穀較少者并應酌量加增並令妥議章程
辦理一留壩寧陝石泉等廳縣應行建築城垣
棧內東河橋草涼驛廢邱關南星馬道大安驛
黃壩驛等處應行添建土堡令其照例估辦奏

入

上從之

二十五日

戊子

額勒登保奏言據達斯呼爾岱羅

聲稟報連日分兵趕剿賊匪分股向大寧尖

山壩竹團坪一帶亡命奔逃我兵亦悉力跟追

初四日在馬合坪趕及賊匪殲斃九名生擒三

名賊匪鑽林四散經遊擊張拱辰楊杰搜至鳳

仙關殺斃二名生擒二名滾巖跌斃二名餘匪
向香坪水田坪奔竄適據寨民報稱附近三十
餘里之一碗水老林有零匪潛匿已陸續聚有
三四十人達斯呼繭岱等卽令叅將李應元遊
擊楊杰分帶兵勇前往殄洗是夜風雨交作卽
乘夜冒雨進發初九日黎明趕上賊尾我兵分
爲兩路衝入該匪猝不及防四散紛竄當斃賊

匪十九名生擒偽總兵唐耀坤先鋒王士倫黃
貴及餘匪十五名有軍功胡高鄉勇胡天有生
擒僞元帥趙金友並經趙金友指認殲斃賊匪
內有僞總兵譚思盛一名隨割取首級查訊尙
有餘匪九名逃逸隨即督兵跟搜初十日追至
元壩子地方適前派另路搜捕之遊擊張拱辰
馬成林帶兵由香草壩前來又將該匪陳均賜

九名一併弋獲此股全行辦竣達斯呼爾岱等
現仍督兵由水田坪燕子坪一帶探剿原追之
賊並將獲犯首級耳記解送到營臣等會同審

訊緣趙金友係湖北襄陽人曾在高二高三馬

五營中充當探馬頭前經率眾竄陝經臣額勒

登保親督官兵在光棍嶺剿潰潛逃未獲復經

官兵臨陣生擒可見此等兇徒斷難倖逃顯戮

審明後當將該犯同唐燿坤王士倫陳均賜等三十名均分別凌遲正法並將生擒趙金友之軍功胡高鄉勇胡天有各加賞銀一百兩並擒偽總兵先鋒各兵勇分別賞資另發銀三百兩均勻分給該路在事圍剿之兵勇以示獎勵又據叅將哈豐阿劉健標稟報在七里坪林內探剿殺賊二名生擒偽先鋒陳科一名又田朝貴

連日分帶官兵由黃連壩櫻桃溪一帶排搜擒
獲賊匪四名該匪總在大寧太平山內潛匿避
兵現仍設法趕剿又據雙石子營盤副將唐文
淑稟報探聞附近之鐵礦坪有零匪夜出掠食
遂派令藍翎千總周貴外委李倫帶兵五十名
探蹤緝捕戮斃五名生擒六名內有僞先鋒李
棟一名並掠同官寨寨民盤獲二名又據提督

豐紳報稱初四日探有零匪五十餘人由楚邊
紅池老林竄來有奔大堰老林之勢豐紳當卽
帶兵截擊殺斃五名生擒十一名餘匪四散入
林現在分派官兵入林搜緝竊思各處殘匪零
星分竄兵勇不能得其蹤跡而各寨民憑高下
視較爲確切搜捕易於得手隨又出簡明告示
填明賞格隨處曉諭令其緝搜連日據安民嗣

三陽寨鳳凰寨小碕寨太平寨迴龍寨人和寨
各寨民陸續搜獲賊匪十八名耳記八副隨時
解送來營均給與賞銀加以獎勸臣等查大寧
太平雲開各處殘匪經連日搜殺計百十八所
餘各屬零匪不成股數現在達斯呼爾岱等所
剿之賊竄近雲陽已在老林之外不難得手

臣

等又飛札豐紳滿尚佐緊扼川界探剿毋許零

匪東竄田朝貴趕剿之賊現竄太平之十里坪

叅將羅思舉亦在雞鳴寺一帶搜捕可以探蹤

夾擊副將桂涵馬元等帶兵在東太境內趕剿

數十零匪尙未據報情形臣等現將一切機宜

詳悉商定拜摺後臣額勒登保卽向太寧界內

之六堂溪尖山壩一路進發臣勒保由南亞壩

一路西進以期分投督飭趕緊蒞功再臣等昨

在開縣所屬縣壩會合後連日合營一處一面
督飭鎮將搜捕一面酌擬留防搜捕章程分款
開列恭請

聖訓一請先撤外省客兵及東三省馬隊以節糜費
前此三省官兵不下十萬餘名節經_臣等裁撤
此時統計存兵尙有五萬餘名現擬將東三省
馬隊以及外省客兵全行凱撤以節糜費而示

體卹一請留本省官兵分路防剿以清餘孽查
此時餘匪勢極零星若照舊以大隊官兵追剿
費力多而難於集事今擬四川酌留本省兵勇
一萬二千名分布川東川北湖北酌留本省兵
勇一萬名分布歸巴興房二竹一帶合於山內
山外四路排搜陝省酌留兵勇一萬五千名分
布營卡常川會哨以絕川楚餘匪竄陝之路統

計三省每月約需餉銀十四五萬兩經費亦較前大減一請撤經畧叅贊之名以肅全功查此時零匪不過如向來啣匪之類本省地方文武辦理自可漸次肅清若久留經畧叅贊名目似非體制臣等現在寄商德楞泰擬於月抄月初會合拜發六百里之摺德楞泰卽遵

旨進京臣額勒登保擬將經畧印信先行申繳一請

川陝楚三省分駐大員以資統率臣等分駐官

兵之後必須有人統率庶幾呼應較靈川省有

勒保督辦陝省留防官兵卽交與奎賽冲阿揚

遇春統率防剿至楚省現經德楞泰在彼奏明

派令鎮將等分段搜捕並調提督慶成前來督

辦將來德楞泰進京後臣額勒登保將陝境事

宜辦定卽親過湖北周歷查閱再行回京供職

一並將隨征鄉勇改作綠營餘丁以資鈐束查
四川所存征勇六千餘名陝西所存征勇五千
餘名卽日撤勇時其有家有業情願歸農者聽
其回家安業外其餘無家業而情願歸營者約
計二省不過數千人仰懇

聖恩准其照新兵之例各給守糧一分俟有制兵缺
出隨時撥補旋補旋減約一二年卽可均補制

兵實缺而此項額外守糧亦可裁盡實於安頓
鄉勇之法萬全無弊

同日吳熊光奏言據總兵慶溥稟報該鎮所剿
仙女山竄匪與朱家山平陽壩之賊合夥共有
六七寸人先後翻桐木園向茹子坪奔竄經都
司麻光裕帶兵迎剿該匪向陰峪河逃逸慶溥
分兵數路追襲該匪在於房巫交界之大草塘

深林內依險屯紮都司陳天壽遊擊馬濟盛都
司余步雲李如緒分路進攻並派千總齊慎等
帶兵抄上山頂憑高下壓賊匪四散潰奔當時
殲斃七名生擒八名並據獲賊於賊屍內指出
僞先鋒劉世榮一名尙在搜捕餘匪等情並准
提臣楊遇春知會現亦督兵前往協剿又據竹
山縣范繼昌報稱有零匪八九人在該縣之羅

葡汗老鷹溝一帶藏匿適有大梟竄來賊匪數十人與之合夥向西奔逃緝守備辛得勝帶領練勇搜捕鎗斃一名餘匪各持亂石擲打各勇受傷者數名該匪向竹谿竄去當報知總兵李天林趕往長村壩一路探蹤追剿等情又據叅將毛秉剛稟報督率守備劉春在歸東一帶之黃金亞搜獲賊匪二名又據叅將王占鰲李貴

稟報在歸州水田霸等處搜獲賊匪四名遊擊
李東宜在林家寨老林搜獲零匪三名千總李
秀在白馬灘殲斃賊匪一名溺斃一名又歸州
團練委員汪鎔督同寨勇殲斃賊匪一名又房
縣團練委員王斌第帶同寨勇擒獲賊匪二名
鎗斃一名保康縣寨勇亦擒獲賊匪一名餘匪
逃入老林現均嚴搜等情臣已就近飭提俟解

到審明辦理又據房縣孫捷三稟報陰峪河竄
出之賊經桃李坪團長革士榜等殲斃一名並
據黃龍寨首領陳士謙姜發尙稟報當卽率勇
擒捕內有一賊强悍異常將寨勇栗舉斃死並
連傷寨勇栗虎栗有貴李宗堯三名被寨勇汪
國興鎗斃查係苟文明餘黨喬老三又搜獲賊
匪苟文剛苟四驍子陳弼鞏大有四名稟解前

來

臣

親提查訊據苟文剛苟四鵬子供稱係苟

文明族弟并稱苟文明有胞弟苟文曲苟文武

苟七麻子並有一子苟朝九一姪苟朝閣都在

賊營管事苟文明殺死後苟朝九苟朝閣各自

逃散本年四月內苟朝閣一股四十多人走到

房縣八角廟地方同鄉勇打仗苟朝閣被鄉勇

用鎗打死並殺斃矛手八名等語

臣

查苟朝閣

亦係積年賊目既已殲除亦少一害目下南路
零匪日見減少房竹一帶文武所稟想卽係興
歸等處剿散之賊臣徧加訪詢因南路巫巴交
界之龍船河每交伏汛水勢盛漲賊匪不能竄
越是以賊見南路搜拿緊急俱由北路川楚邊
界老林向西滙竄臣已飛飭慶溥李天林將房
竹境內竄匪緊躡追擊不得稍有鬆勁再在楚

東三省馬隊官兵現經德楞泰撤赴房縣交

臣

酌量裁撤

臣

查目下楚境尚有零星匪竄且隨

營鄉勇夫役人數既多往往藉衆滋事東三省

馬隊聲勢素著

臣

擬將傷病不能得力者先行

挑出凱撤回京其奮勇官兵暫留一兩旬俟搜

捕零匪完竣再酌分兩起先後起程如此分別

辦理不但沿途需用船隻車輛可以從容應付

不致擁擠貽誤而房竹一帶亦可藉資彈壓均

奏入

上命軍機大臣傳諭額勒登保勒保曰額勒登保等督率將領分路搜剿多有斬獲共計殲擒賊匪百十人並將偽元帥趙金友拏獲現在川省零匪統計不過二百人卽合之楚省零匪亦祇剩三百餘人無難尅期辦竣額勒登保勒保於拜摺後卽分

東西兩路進發分投督辦俟川匪排搜淨盡額勒
登保親至湖北周歷巡查所見亦是湖北襄陽爲
教匪起事地方額勒登保於德楞泰起身後將川
省零匪辦淨自應到楚親歷周巡更可藉資彈壓
本日吳熊光奏留東三省馬隊官兵額勒登保俟
回京時卽可帶領由襄陽至河南一路凱旋俾所
過地方知經畧親帶大兵回京聲勢更壯其川省

應撤弁兵應行進京者亦可一併順帶前來不主陝
省南山餘匪祇剩一二十人屆時當早已殲淨該
省有將軍興奎提督楊遇春足資鎮撫將軍賽冲
阿應令仍遵前旨帶兵回至甘境幫同惠齡等辦
理番賊至另摺奏籌商裁撤客兵及酌擬留防搜
捕章程所議悉合機宜鄉勇一項隨征日久半係
無業可歸之人朕節次降旨總以安頓鄉勇爲亟

額勒登保現咨商德楞泰請將現無家業情願歸
營之人准照川陝所設新兵之例各給守糧一分
俟有制兵缺出隨時撥補所見甚是入營充伍既有
錢糧可資養贍該營員等更可隨時鈐束如有桀
驁滋事者即可懲之以法額勒登保等籌議及此
既稱萬全無弊此卽伊等專責設安置稍有不妥
惟伊等是問此外如先撤外省及東三省馬隊之

兵請留本省官兵分路防剿每月所費餉銀不過
十四五萬並於川陝楚三省分駐大員以資統率
各款均照所議行再據稱拜發六百里喜摺之後
擬將經畧印信先行申繳一節此可不必現在三
省邪匪雖已蕩平尚有一切應辦善後事宜卽日
德楞泰進京後額勒登保由川赴楚順道排搜一
切文檄往來均須鈐用印信非如叅贊德楞泰現

係成都將軍尙有本任印信可用者比額勒登保
若將經畧印信先行繳回轉恐呼應不靈且三省
歲功完善中外欣慶額勒登保始終其事其印信
自應俟入都時親自贖回方符體制又前據吳熊
光奏胡明遠供詞內有苟文明之弟苟文武一犯
當卽降旨令額勒登保詳查嗣據查覆並無苟文
武其人本日又據吳熊光奏拏獲賊匪苟文剛苟

四韓子據供苟文明有胞弟苟文曲苟文武苟七
麻子三人雖賊供未可盡信但前後兩次均供有
苟文武之名或者實有其人亦未可定額勒登保
當隨時留心嚴飭將領兵勇認真緝拿毋任漏網
上又命軍機大臣傳諭吳熊光曰吳熊光奏各路官
兵分投搜剿餘匪各有斬獲並據黃龍寨首領稟
報擊斃苟文明餘黨喬老三生擒苟文剛苟四聲

子等四名現在楚省零匪見減少不難尅日殲
除惟賊匪見南路搜拏緊急俱由北路川楚邊界
老林向西滙竄吳熊光當嚴飭將領認真搜捕不
可因德楞泰回川無人督剿以致辦理稍有鬆勁
務將境內零匪就地殲除不可以驅逼出楚卽爲
了事更不可使川楚邊界餘匪或又闖入倘湖北
境內散竄之賊不能及早殄淨將來又須德楞泰

回楚督剿成何事體耶至目下該省尙有零匪竄
匿隨營鄉勇夫役往往藉聚滋事請將東三省奮
勇官兵暫留一兩旬藉資彈壓等語所辦甚是與
朕疊次所降諭旨適相符合房竹一帶旣需彈壓
所有撤赴房縣東三省馬隊官兵除傷病不能得
力者挑出凱撤外其奮勇官兵不但僅留一兩旬
卽多留數月俟經畧凱還時隨同進京更昭慎重

所有此次擊斃賊匪喬老三之鄉勇汪國興著吳
熊光酌加賞賚給予頂戴倘業有頂戴卽賞給藍
翎用示鼓勵